

焦太史編輯國朝獻徵錄

焦太史編輯國朝獻徵錄卷之四十四目錄

刑部一

尚書

周禎

錢唐

世家寶

端木復初

程徐

李質

吳雲

開濟

楊靖

暴昭

侯泰

趙軀

魏源

俞士悅

劉廣衡

陸瑜

王槩

董方

林聰

杜錦

何喬新

彭韶

白埒

閔珪

屠勲

韓好問

王繼之

洪鍾

劉璟

張子麟

山陰張爾葆

同校

目錄終

吳興茅元儀

焦太史編輯國朝獻徵錄卷之四十四

刑部一

尚書

刑部尚書周禎傳

雷禮

周禎字文典應天府江寧縣人元末兵起流寓江湖間庚子年王師平僞漢入仕擢江西按察司僉事吳元年陞大理寺丞本年陞大理寺卿十二月詔禎同省臺李善長劉基陶安定律令上諭善長等曰立濬貴在簡易使人易曉若條緒繁多或一事而兩端可輕可重奸貪之吏得以夤緣爲奸則所以禁殘暴

者反以賊良善非良法也卿等宜盡心參究凡刑名科目逐一來上吾與卿等面議斟酌庶可以爲久遠之法又謂劉基章溢并禎曰紀綱法度爲治之本所以振綱紀明法度者則在卿等爾等執法上應天象少有偏曲則綱紀法度廢弛而民不得其安況或深文以爲能苛察以爲智若寔成邳都周興來俊臣之徒巧詆深文恣爲酷害終亦不免若干公陰德子孫乃致貴顯天道昭然深可畏也洪武元年八月設六部附刑部尚書本年改治書侍御史及建廣東行中書省除參知政事開省之初州縣正員多缺廣州香

新司政上石

山縣治徙在蓮峯經兵燹而廢縣丞冲散訪在城故址經營廨宇縣治既成百務悉辦流移四集狂寇倏至敬率民捍禦寇乃遁去縣民賴敬以安竟以勤歿禎至卽祭之雷州同知余騏孫開設府治增築沿海堤岸揭陽縣丞許德增闢公署核實田畝上其冊籍禎加旌賚知廉州府脫因蒙古人也招徠流民農皆復業知惠州府萬廸興廢舉墜不受私誦乳源知縣張安仁改建縣治創立城池學校撫綏流徙清遠知縣李鐸勤政興學歸善知縣木寅鼎立諸司廨宇長於撫恤皆上其績會下詔開科禎豫聘名儒以待考

試洪武二年冬十一月刑部尚書世家實坐黜上  
復召禎爲刑部尚書三年以年老乞致仕

刑部尚書錢唐傳

雷禮

錢唐字惟明浙江寧波府象山縣人博學敦古行洪武元年舉明經陳王道數千言雅稱太祖意特授刑部尚書二年詔孔子春秋釋奠遣使降香曲阜改廟於仲月上丁致祭京師免祀天下不必通祀唐上言孔子百王宗師先儒謂仲尼以萬世爲主天下祀孔子天下共遵其教報本之禮不可廢也時修孟子節文并議廢其配饗唐論之尤力太祖皆從其議一日召講虞書升座而講或紆唐草野不知君臣禮唐正色曰以古聖王之道陳於陛下不跪不爲躬



又常諫宮中不宜揭武后圖忤 旨待罪於午門外  
終日 上悟賜飯卽命撤圖本年致仕

世家寶傳

朱睦㮮

世家寶者臨潁人也其先出蒙古安貌豐整有文武才本姓初仕元賜姓世至正末以集賢院學士守膠東登萊諸郡洪武元年大將軍下山東遣叅將傅友德取萊陽正月丙子家寶藉車馬之數同僉院王世隆等詣降上嘉納授之大理寺少卿是年八月始設六部以家寶爲禮部侍郎二年陞刑部尚書未幾坐事貶知廬陵召還授兵馬指揮司副指揮改兩浙巡鹽使司同知十五年進知陵安府秩滿賜致仕還後復召至京師遣賑廣東興寧長樂二縣饑民所活

甚衆二十七年冬卒於家子寧軍功授泗州鎮撫

刑部尚書端木公復初傳

宋 濂

余友端木君以善旣卒之一年其子智衰經踵門泣拜而請曰智也罪釁深重禍延先公以洪武癸丑三月乙卯卒於南京之官舍壽僅五十又三遂以是年某月某日葬於嶢山東村之原竊惟先公自少有志事功其善政在人者今多能言之又十年則言之者或寡矣又十年則無人能言之矣此無它人遠者其言湮世易者其事晦亦恒理爾一念及茲寧不使人興懷乎然而托名文辭者可以垂之無窮千百歲猶夫一日也此爲人子者所恃以無恐願先生進之按學

子劉剛狀君諱復初以善其字也姓端木氏其先爲  
術人出於孔門弟子子貢之裔今獨以端木氏者從  
省文也一遷於大梁再遷金陵烏衣巷三遷於溧水  
縣之曉山其詳備見譜圖記中曾祖時中祖安父邦  
達妣某氏君有遠志不肯寂寂落人後至正初以儒  
試吏江南行御史臺同列多貴遊子弟爭事表祿君  
獨泰然不失其恒行久咸畏服之俄遷書吏海右憲  
部君佐部使者行州縣彰善彈惡威聲獨著聞會四  
方兵動東南爲尤甚君袖策言時政之急如此則可  
守如此則可戰否則有敏手就降而已上官聞之皆

落落不合君仰天歎曰彼以吾發狂言耶時事從可知矣於是悵然有鄉土之思溧水道絕不能歸僑居金華日以書史自娛至正己亥 皇上親御六軍取金華命常忠武王鎮之王聘君至幕下未幾君辭去會有言於朝者癸卯三月召爲徽州府經歷君爲江東大郡政繁而賦殷君悉力佐治百廢具舉功則歸於其長田賦久不均民不堪命君卽城東建竹使民自實田集爲圖籍覈盈朒驗虛實而定科縣吏民陰爲欺弊痛謫之不數月而畢山是民無逋租官無橫斂三皇孔子廟皆築臺門旅館之制亦廢君或葺或

建咸中程式賦不及民皆若不知者丙午冬改通判  
吉州府吉俗尚譁計素彌難治君召父老子弟戒之  
曰余聞爾民尚豪侈樂訟聞 朝廷子惠元元春雨  
秋露無不霑濡爾曷爲良民以報 上德寧梗化以  
自戕耶梗化弗祥天刑所不貸爾其識之民皆惴惴  
無敢執牒妄訴者丁內艱服除洪武辛亥春被召赴  
京除磨勘司丞時官署新立凡泉粟之出納刑法之  
是非物貨之變易無所不當獻君從本達末自流徂  
源勾稽隱伏纖芥軒露每一奏對 上輒延譽之未  
幾陞爲令君嚴於限域人見輒畏不敢有所請托俄

僚屬皆以貪墨敗磔首東市唯君能獨存清白之行  
益表見朝著間冬十一月超授嘉議大夫刑部尚書  
君之用刑本諸法律而持以平恕老於議法者咸以  
爲允杭州馬甲飛糧事覺逮繫者百餘人詔君往  
治其獄分羣囚別所人各鞠之令其辭參焉同多者  
情真否則僞郡守以下皆服罪壬子春三月拜湖廣  
等處叅知政事階中奉大夫湖廣素彌重鎮屬兵戈  
蹂踐之餘土曠民稀君首下屬州民復業者復其賦  
一年次閱官書凡糧儲轉輸錢幣出入與夫軍裝工  
役皆預爲計畫且會官屬問事不集者其故何縣皆



曰一省所轄府州縣二百有餘遠者在千里外每官  
多闕其事因不集君奏請於朝擇在職賢良吏攝其  
政不數月無事不舉民驚以爲神旣而以事召還京  
師俄以疾卒居官能守貧嘗著座右銘曰爲官實難  
貧然安事有不可急中存寬又曰心契上天脚踐實  
地人謂其能自警云故翰林學士朱升嘗謂君爲人  
其謙退似懦夫其專謹似腐儒瞻視精悍似俠客掀  
髯談世事似辯士而其精神超越又似逸民隱者人  
謂爲實錄 端木孝文溧水人尚書以善子與弟孝  
思皆以儒士起家孝文爲翰林待詔孝思爲翰林侍

書先後使朝鮮以清節爲遠人所服立雙清館

應天府志

刑部尚書程徐

雷禮

程徐字仲能浙江寧波府鄞縣人父端學以明經登至治辛酉進士第與伯兄端禮皆敦尚經學修飭古行人稱爲小二程官編修國子助教以徐貴贈嘉議大夫禮部尚書輕車都尉廣平侯鄞縣男妣余氏周氏俱封廣平郡夫人徐遂於春秋得編修公家學由翰林院從事發身太史院校書郎遷奉禮郎爲中書曹掾從太史丞相軍擢禮部主事改刑部復改戶部陞中書檢校官拜監察御史陞本臺都事出貳江西憲以才諳稱於時太傅左丞相河南王承制起爲兵

部右侍郎不赴後召爲國子司業至京改任詳定使  
進兵部尚書上輕車都尉廣平侯鄆縣男疏乞致仕  
入國朝 太祖高皇帝以才名召見命爲吏部侍郎  
洪武二年 上以孔子釋奠止令行於曲阜孔廟天  
下不必通祀徐上疏諫曰臣徐伏觀今春上下先聖  
先師釋奠之禮權且住罷人心惶惑士氣銷沮臣徐  
愚慙亦切疑懼不知所裁以爲 陛下崇尚儒術篤  
意教養惟恐人民不學綱常之或壞必不肯廢孔子  
之祀以慢聖人之道也 聖意必有所在然臣竊以  
爲不可何則祀事之典所以崇本始報功施也古今

之祀典多矣而獨社稷三皇與孔子通祀於天下者  
豈無故哉社稷者生民之本三皇者開極之主而孔  
子者萬世之師也曠古以來帝王之治天下教養二  
字而已民非社稷三皇則無以生非孔子之道則無  
以立斯二者在國家在天下在萬世不可一日或廢  
者也故有國者敬而祀之必徧天下以及後世無非  
維持人心世道之計而示人以崇本始報功施之典  
耳三代而上若堯舜禹湯文武周公皆聖人也然而  
發揮三綱五常之道載之於經以之儀範百王師表  
萬世使世愈降而人極不墜者孔子之力也孔子以

道設教其心未嘗一日而忘天下天下祀之非祀其  
人祀其教也祀其道也天下一日不可無孔子之道  
則其教不可一日廢天下一日不可無孔子之教則  
其祀不可一日廢今使天下之人必讀其書由其教  
行其道而不得通祀焉豈可以崇本始報功施也哉  
夫社稷三皇孔子其澤施於人也同天下之所賴以  
生立者同得通祀於天下而百代不改者又同一旦  
廢不祀甚非所以維人心扶世教之道也天下後世  
其謂之何後生晚進何所師法凡父兄之教其子弟  
及大學之肄業於庠序學校者皆將謂我 國家滅

裂孔子之祀忽畧聖人之道其肯勉致力於教於  
學則人才何由而成綱常何由而正臣竊爲  聖明  
之朝惜也若曰孔子非如佛氏之千百化身不可一  
日間赴天下之祀而遂廢其禮則三皇后稷亦皆生  
爲人而歿爲神又安得享天下之祀於一日之內乎  
蓋孔子以身載道也孔子之道卽綱常之道斯道所  
在如矢之無不覆地之無不載如家至而日見之也  
非可方體而求之也非可以一念之靈視之也其道  
通於天下則其祀亦宜通於天下以故臣愚不知忌  
諱妄謂  陛下欲稍革前代之文以正祭祀孔子之

禮宜於春秋仲月上丁遣使致祭於曲阜林廟仲丁  
致祭於京師廟學令天下府州縣於季丁通祀焉如  
是則既有等殺之節無褻瀆之過其於祀神之禮損  
本之誠開示正學之方扶持世道之計可謂曲盡而  
無遺矣臣徐亡國逋臣遭逢聖主既宥其罪復  
寵錫以官報效弗稱夙夜祗恐不懼斧鉞僭竭衷忱  
臣不勝激切屏營之至上允其奏改刑部侍郎三  
年陞本部尚書本年以壽終爲人精勤通敏剴繁落  
剴事無留滯能文尤工於詩歌有遺集傳後



刑部尚書李公質傳

黃佐

李質字文彬德慶人其先自祥符人徙通經學有大志元至正間行省左轄東莞何真知元運將燼爲守備計辟質叅機務德慶民何國寶張宗達倡衆爲亂真以兵遣質歸募鄉兵二萬餘立堡棚於龍岡之上與陳文仲設策防禦時官舍民廬俱焚毀殆盡守令將帥悉付印綬於質質亦挺身爲經畫朝夕練兵遣其從子伯豫同提督文仲督募兵討諸賊悉平之上連蒼梧象郡下接三山九江皆蒙其保障質尤好文雅士多往依之其最知名者則江右伯顏子仲茶陵

劉三吾建安張智洪武元年征南將軍廖永忠等征  
嶺南質封府庫詣轅門款附何真入覲 高皇帝慰

諭之質與真皆扣頭謝是年十二月授質奉訓大夫  
中書省斷事五年二月遷中順大夫刑部侍郎三月  
陞嘉議大夫刑部尚書質立朝寵遇值山東饑遣質  
往賑賜以御製詩遣卿持檄按山東念兩賢勞久著  
功經國老臣勤撫恤行天使者起疲瘵官儲有粟宜  
從賑囊橐無私任至公七十二城皆歷遍馬蹄無處  
不春風九月授中奉大夫浙江行中書省叅知政事  
八年致仕居京師誥贈其祖次春禮部尚書考廣孫

如已官十一月復授資政大夫靖江府右相在任幾  
四載而卒爲開國功臣有樵雲集傳於世次子伯震  
舉懷才抱德科試大祀慶成賦及策論皆中高等博  
學無所不通能爲詩歌江右十才子周澐者至廣見  
而稱許之初授廣西容縣知縣永樂甲申改順天府  
大興知縣蓋特恩也時方肇建北京而卓有勞績  
後以父任拜光祿寺丞

嘉議大夫刑部尚書宣興吳公雲傳

李應禎

尚書吳公雲字友雲宜興清泉鄉人世業儒父仲饒仕元湖南財賦提舉公少有文行爲國子生同輩皆推重之國朝洪武元年太祖高皇帝遣魏國徐公北定元都魏國以禮敦遣公赴京是年九月除弘文館校書郎二年改陝西渭南縣丞四年召還擢刑部郎中尋遷磨勘司令五年拜刑部尚書六年出爲湖廣行中書省叅知政事八年坐事被逮至重其才卽釋之時以元梁王據雲南尚未下特命公往使諭之

曰今天下混一四夷賓服獨雲南一隅未奉正朔殺  
我使臣朕欲以兵取之恐勞師費財且傷遠人鄴能  
爲朕作陸賈乎公對曰天命所在誰敢違之第彼恃  
遠故阻聲教臣奉陛下威德往告以大義諭以禍福  
彼必附順若冥頑不從興師未晚 上然之遂遣公  
行會梁王使鐵知院等二十餘人使漢北爲大軍所  
獲械送京師 上欲以恩懷之令與雲偕行至雲南  
之沙塘口鐵知院等謀曰吾屬奉使不達中道被殺  
而還罪必不免於是說公改易制書共給梁王公不  
從欲殺之適梁王亦遣人來却降逼令胡服辨髮往

見公曰朝廷念雲南一方生靈不忍加兵特遣使持  
勅招降汝輩今反欲脅使臣以降邪吾以死自誓終  
不爲汝屈遂被害既而梁王壯其節命收其骸骨送  
蜀給孤寺藏之後雲南竟入版圖朝廷始知公之歿  
適其子黻亦以其事來白乃命馳驛奉視歸葬而許  
黻爲國子生黻貧不能還鄉以公嘗仕湖廣卽葬江  
夏縣金口鎮歲久遂占籍江夏應禎往來宜興知公  
之名久矣及官南京兵部以公事過湖訪其子孫得  
之至金口將謁公墓已犁爲田居人莫肯言者蓋其  
家赤貧故不祭侵者已久莫能辨識於是求其地契

則與家藏誥命及遺書俱燬於火矣爲之歎息不已  
獨嘗考論公之爲人於學士大夫及鄉之故老得公  
使事爲詳重其伏節歿義可以爲世道之勸輒書而  
爲傳後必有白其事於朝者則公之名當與金華王  
忠文公並傳於世也弘治中都御史王詔巡撫雲南  
爲請於朝命復贈公刑部尚書諡忠節與王禕並祀  
改祠額爲二忠

資善大夫刑部尚書洛陽開濟傳

國史實錄

濟洛陽人初爲國子助教與丞相胡惟庸善以疾罷歸訓徒里中十四年前御史大夫安然薦其材召拜刑部尚書初至官勤政有爲嘗令諸司各置考功圖日書官員所行事績以覈其勤怠又言今內外奏札宜減省繁文軍民以細故犯罪者宜卽決遣無久拘禁數日之間獄無淹滯上以濟有才頗信用之濟由是自負持法漸肆巧詐性殘酷好以法中傷人凡意所不悅輒深文巧法以入之無能自脫者濟與鄉



人有舊怨乃誣構下獄令郎中仇衍等鍛成之嘗不  
奉旨擅移文督責諸司若中書所爲者又爲榜戒其  
僚屬曰尚書到任日久事之遲錯皆寬大容忍復爾  
則罪不爾貸奏請揭於文華殿以示於衆 上曰爾  
告戒僚屬之言欲張之殿廷豈大臣禮耶濟慙謝未  
幾又立簿曰寅戌之書以限僚屬出入 上聞切責  
之曰古人以卯酉爲常道今使趨事赴工者朝自寅  
暮盡戌奉父母會妻子能幾何時耶濟不聽獄中有  
禁歿者濟亦不問常受一囚賂以獄中歿囚代而脫  
之是以爲獄官所發 上詔濟論之歸部與侍郎王

希哲主事伍叔微執獄官於獄扼其吭而殺之其恃  
權罔上傷害良善類如此 上屢訓諭之不悛會有  
告其在洛陽時常道得賈人贖賈人示重賞濟得賞  
乃還之又強其甥女閭氏爲奴使濟妹亦早寡姑在  
獨濟利家財盡掠取攜其一子以歸其姑欲訴濟輒  
捶逐之於是監察御史陶臣仲等劾奏濟瀆亂人倫  
有傷風教不可爲國大臣又擅殺獄官及言濟奏事  
時置奏札懷中或隱不言欲入殿 皇太子至則又  
不言乃復入奏覘伺上意務爲兩圖奸計莫測 上  
怒乃下濟獄併執侍郎王希哲郎中仇衍等詔廷臣

訊之濟具服其奸狀於是併希哲等誅之初濟上  
待之甚厚濟亦嘗侍左右見御製詩文輒請歸潛列  
以誇大聲勢又所爲多不法是以見疎濟爲人有材  
辨然陰毒狡險外事諛悅嘗朝罷上召與論政事  
濟畧無建明但稱曰真聖人真聖人故上深惡其諂  
佞及於敗

刑部尚書楊公靖傳

潘 垣

楊公靖字仲寧淮安山陽人洪武十八年乙丑舉進士爲庶吉士試事吏科十九年丙寅擢戶部試右侍郎實授左侍郎在職公勤 詔有司復其家因進士監生犯罪不悛 御製大誥指示而激勸之曰如通政使韓宣左通政茹瑄戶部侍郎楊靖工部侍郎秦達皆同時由進士監生而登顯職各能率職以稱朕心其操也恪遵先聖先賢之道故能伸於羣職之上其犯罪不悛者終至於殺身二十三年庚午五月陞刑部尚書二十四年辛未命以尚書兼太子賓客給

兼官休公資性明敏有識善敷答理刑平恕 上數  
獎勵之尋以事免 命出使安南還改左都御史至  
是鄉人坐事繫獄家人擊登聞鼓訴狀靖爲改狀卓  
御史劾之 上念其才不之間御史論不已廼賜盡  
於家父懋兄安奉 上命歸葬於淮年三十八公平  
生自負忠赤束書入京不十年位崇台輔以布衣奉  
使海外蠻貊敬信則其人可知矣其生也歟也莫非  
天也而何預於人哉作誌者隱其詞諱其姓名亦過  
矣

刑部尚書暴昭

雷禮

暴昭字

山西平陽府澤州人洪武中以薦舉

授北平布政司叅政二十八年陞都察院左都御史

二十九年陞刑部尚書三十年五月奉 旨取大誥

條因附載於律名曰大明律詒 上御午門諭羣臣

曰朕有天下倣古爲治明禮以導民定律以繩頑刊

著爲令行之已久然而犯者猶衆故於聽政之暇作

大誥昭示民間使知趨吉避凶之道古人謂刑爲祥

刑豈非欲民並生於天地間哉然法在有司民不周

知故命刑官取大誥條因擬其要畧附載於律凡施

文禁例悉除之除謀逆并律誥該載外其雜犯大小之罪悉依贖罪之例論斷今編次成書刊布中外令天下知所遵守刑期無刑庶稱朕恤刑之意六月署政平訟理二旂論罪囚 上諭昭等曰人言法家少恩此後世用法之過故有是言朕觀唐虞之世好生之德洽於民心安有是言哉爾等每論囚引至朕前雖詳其致罪之由然一時裁決恐未得其情自今論囚惟武臣歟罪朕親審之其餘不必親至朕前但以所犯來奏然後引至承天門外命行人持訟理旂傳旨諭之其無罪應釋者持政平旂宣德意遣之繼令

五軍都督府六部都察院六科給事中通政司詹事  
府詳加審錄寃者卽爲奏聞無寃者實犯寃罪以下  
悉如律其雜犯寃罪者准贖革除二年充採訪使至  
北平知有變亟歸言於朝靖難師入京執之不屈  
上怒命先去其齒次斷手足次斷頭而死



刑部尚書侯公泰傳

鄭曉

侯公太甫和人累官至刑部尚書靖難兵起太督餉山東濟寧不守輜船陷沒還京建文四年又出淮安總軍餉得便宜行事 文皇卽位公至高郵與其隸上高茅卯仔同執下錦衣獄是年七月歿弟敬祖子玘皆論歿籍其家幼子京兒永樂九年尚繫錦衣獄

刑部尚書趙公狷傳

李 廉

趙公狷字雲翰號雲澗祥符雲驥播人也其父自邢臺遷汴元季兵亂公方在襁褓母抱匿林莽間有虎至母懼置公於地虎熟視而去公自幼聰敏嗜學不倦稍長游郡校嘗暑夕寢費舍中羣狐採麻葉作扇扇平之驪呼曰趙尚書苦熱吾輩敢憚勞邪公聞之寤益勵志讀書中洪武丁卯鄉試入太學被命公幹山東以才勤受襲衣楮幣之賜庚午授兵部職方司主事圖天下要害阨塞屯戍貼說以獻 高皇帝嘉其能乙亥擢武庫員外郎慎密小心爲當路所器重

戊寅擢浙江右叅政時海寇爲患公畫策捕之地方  
底寧尋罹外艱還汴 文皇帝嗣位以公能專對命  
使交趾克宣 國威遠夷警服歸卻金寶之饋 上  
聞而嘉之 賜賚優渥甲申擢刑部右侍郎未幾改  
工部再改禮部被命往封西寧侯宋晟歸拜禮部尚  
書賜宴於華蓋殿仍徹御筵膳羞以遺其母士林榮  
之戊子 仁孝皇后崩 上命公詣北京卜山陵告  
成有楮幣之賜壬辰經畧創建隆慶保安永寧諸郡  
公撫輯調度咸中機宜而新徙之民各安其業罔知  
勞役焉丁酉改兵部尚書明年母歿守制還起復專

年四十  
後四十  
四  
年

理塞外戎政偶疾作 上遣中官偕名醫往視少瘳  
入謝復令調攝於家既愈復命詣塞北訪牧地遂具  
順聖川等處以 聞於是出廐馬牧之禁用蕃息壬  
寅 聖駕北征命公總督軍餉公措置有方餉不告  
匱 仁宗嗣位改刑部尚書在職六年處格如一日  
初公爲郎署時一人犯大辟死獄中出其風實閉氣  
詐死也越四十年公爲司寇其人復犯法公一見呼  
其姓名駭曰汝非曩死獄中者邪訊之伏辜人以爲  
神宣德庚戌公年六十七累上疏乞骸骨 上憫其  
勞特賜致仕既歸泮構一室於東郭外偏曰石泉茅  
茨數椽

屋公幅巾藜杖日與親友故舊酌酒賦詩以樂太平  
正統丙辰卒壽七十三 上遣官諭祭命有司營葬  
事公稟賦完厚識見超卓質直孝友博學工詩文遭  
際 明時敷歷華要歷事 五朝才與位稱出與時  
合齋諸廟謨翊贊 皇度勛業在 朝廷惠澤流海  
宇而詩文特其餘事耳晚歲納祿里居優游林壑考  
終於家榮名盛福終始完備謂非一代之偉人歟所  
著有儉父集傳世長子愚舉賢良方正善吟咏有藝  
軒集仕終丘縣尹少子魯隱居不仕亦善吟咏有鶴  
莊集竝藏於家或問於余曰趙公以儉父名其集何

也曰此公之善謔也按晉陽秋曰吳人謂中州人曰  
儋蓋輕侮之辭昔陸機入洛聞左思欲撰三都賦語  
其弟曰此間一儋父欲作俟其出當覆酒甕耳及思  
賦出機驚歎以爲不能及也遂輟筆云論曰吾邑趙  
尚書有異質善賞識臧否正統中錢塘于蒨愍公謫  
巡撫河南時公謝政家居于數造其廬以前輩禮事  
之甚恭一日公執于手嚙之出血于卽悟泣拜請教  
公不答頃于出其孫恠問曰大人何嚙于手公憮然  
曰于好官惜不得令終耳曄史載郭林宗符偉明許  
子將竝有人倫之鑒識深甄藻愍斷終身後無不驗

類後世卜相之事然實無他術亦惟資稟目力異耳尚書公有三子之精識而又以事功顯遐壽終則尤異矣世謂天地間氣鍾爲哲英非斯人也耶

資善大夫刑部尚書建昌魏公源神道碑

王直

正統九年閏七月廿七日刑部尚書魏公以疾終於  
家事閒上爲之嗟悼遣官賜祭命有司治葬事在朝  
士大夫亦莫不惋惜致賻奠先是公有足疾詔俾釐  
務免朝參久之未能愈公嘆曰食君祿而不一造朝  
心豈能自安八年二月拜疏乞致仕上憐而許之  
降勅慰且賜鈔三千貫歸一年而終年六十三公諱  
源字文淵幼而岐嶷喜讀書習於禮節十三能爲文  
嘗作桂花詩爲時輩所嘆賞選爲學官弟子永樂乙



西以書經領鄉薦明年取進士拜監察御史所至舉其職松江知府黃子威被誣不能白公爲辨其在浙東傍海民困於魚課爲奏減之西安大疫民間比屋不能興督有司具醫藥往療全活者甚多涼州有寇將大爲民患公廉得之亟請兵殄除民得免害父母相繼卒皆奪喪起任職爲御史九年陞浙江按察司副使未幾召還署刑部右侍郎會河南旱饑民轉徙乃命公爲河南左布政使至則發倉廩以賑民奏免逋賦省繇役及諸不急之務一以安民爲事民稍稍來歸而雨亦大至是歲有年召爲刑部左侍郎食從

二品祿或言四川邊務多弛廢命公往理之明罰勸  
法衆務修舉還朝拜刑部尚書獄無滯囚凡公所決  
斷者人人以爲不寃時上注意邊事又命往西邊督  
察諸將謹防邊以便宜從事遣都指揮李謙守獨石  
楊洪副之劾奏指揮杜衡等慢令當歿諸將始嚴憚  
不敢肆自天城抵朔州視要險地宜守者凡八分命  
諸將守之請增修開平龍門城使高大皆甃以甃庶  
可守又自獨石抵宣府增設墩墩發開平龍門兵併  
力爲之屯軍免其租一年凡諸大城堡請給神銳火  
藥嚴爲備上皆從之再遣敕嘉勞焉時諸軍有勇

壯者依託權豪以避役公悉搜括歸仕中權豪側目  
一弗顧既而病足不能朝遂以此致仕君子皆惜其  
去而亦莫不以爲榮公忠厚坦亮孝於親友於兄弟  
睦於宗族而信於朋友與人交必依於仁義其襟度  
夷曠洞見肺腑事有可疑者得公處之衆無不愜意  
凡公所蒞人至今譽嘆不能忘魏氏先居南昌之奉  
新後乃徙居建昌故今爲建昌望族曾祖文卿祖庭  
郁父伯泰皆有德義而不仕及公貴祖考皆贈資善  
大夫刑部尚書妣皆贈夫人

榮祿大夫太子太保刑部尚書長洲俞公士悅  
傳

王 鏊

俞士悅字仕朝長洲人自幼讀書過目卽成誦永樂  
乙未進士擢監察御史陞湖廣按察副使綱紀振肅  
貪濁悉自引去民居不戒於火延及臬署僚屬皆奔  
避士悅具衣冠向火再拜風徐返火滅歲早有司用  
道家法焚蛇蟒燕而旱彌甚亟命屏去乃齋沐露禱  
得雨連三日秋滿陞浙江叅政初至佯若不解事者  
羣吏易之越三日發奸撻伏如神豪猾破膽正統壬  
戌倭寇犯境士悅城汴激二浦以備至今賴之尋陞

河南右通政使甫三日召還陞大理寺卿己巳之變陞右都御史留守京師協都督衛穎帥師六萬守德勝安定二門士悅晝夜籌畫甲冑未嘗去體事平賊刑部尚書進太子太保天順改元謫戍遼東成化初赦還復其官卒年八十士悅儀表魁岸面色如鐵聲如洪鍾不類南產平生剛方侃侃見者畏服

刑部尚書劉公廣衡傳

王時槐

劉廣衡字克平，蕪安人。永樂甲辰進士，歷官至陝西右布政使。景泰改元，進都察院左副都御史，同西安侯鎮關中，條奏時政數十事。隣境偏頭乏糧，山西不能給，廣衡督運綏德倉米數萬石，由口外往餉之，軍士咸悅。召還，理院事。閩、浙間鉅盜鄭悵冒王孝忠、嘯聚官臺山爲亂，廣衡奉命討平之，以官臺山險絕而曠遠，出銀鑛易致盜，非伐山通道立縣以制之，不可。於是請以山之楊梅村置壽寧縣，定兵壯戍守之法，示銀穴，啟閉之。令民稱便，立報功祠祀之。季擒

新處州寇祝岳二 命巡撫遼東天順改元以刑部  
左侍郎 召還見便殿論之曰用法無避嫌遷刑部  
尚書明年以疾乞休未行而卒廣衡敷歷中外執法  
三十餘年仁明剛決一統志稱其清修簡朴不事浮  
靡近古人云子喬登進士知歸安擢監察御史持風  
裁陞福建副使有奸人習通私番射利者遇貢舶輒  
紿其人餽遺鎮守三司科取珍貝事發衆欲貸之喬  
曰不可是示外夷以貪使輕中國也必真諸法歷陞  
湖廣右布政使卒

資善大夫刑部尚書萬安劉公墓誌銘

李賢

劉之先河南祥符人其遠祖有曰功甫者仕宋爲江  
西萬安丞子孫因家焉公諱廣衡字克平曾祖仁一  
祖昭年父俊英俱業儒不仕祖父以公貴累贈資善  
大夫刑部尚書祖妣鄭氏妣歐陽氏累贈夫人公自  
幼穎敏在醜夷中卓異如老成蚤失怙恃遭家多難  
諸弟幼弱公與兄廣泰綜理家務家遂以振聞里莫  
不嘉美曰劉氏有子矣汧長入邑庠授易於鄉先生  
翰林檢討宋琮承樂庚子遂領江西鄉薦益肆力於  
學登甲辰進士第宣德戊申拜刑部廣東司主事乙



卯陞陝西司員外郎正統丁巳再陞浙江司郎中凡  
歷二署廉明之譽翕然庚申秋朝廷軫念四方多罹  
饑饉欲廣蓄積以禦荒歲乃簡廷臣分理預備之政  
勅以便宜從事而公在首選往浙江卽日上道遍歷  
郡邑所區畫甚多得粟數百萬石爲四倉以儲之復  
督勸有司築陂塘抑豪強拯困弊事集而民不擾旣  
還朝廷嘉之甲子陞陝西按察司副使命專理重刑  
凡疑獄賴公而明者甚衆巳巳陞陝西布政司右布  
政使明年上以陝西邊務方殷陞都察院右副都御  
史鎮守關中蓋特陞也公益感激自効條陳數十事

皆安邊禦寇利國便民急務多見施行時遷報多警  
公從容裁處咸得其肯綮督修城堡七十餘處復奉  
勅轉輸軍餉數萬石於邕城適歲旱民饑因設法濟  
之俾不失所而公家之務亦辦尋召公還京治院事  
未幾復命往錄南京法司之獄多所平反既還有白  
金綵幣之賚壬申秋復奉命糾察湖廣庶職之廉貪  
者凡所黜陟人服其公且條陳軍民利病數事多見  
采納既還勞以羊酒時浙江福建民鄭懷冒王孝忠  
等作亂特勅公馳往督兵捕之至則賊以就擒公察  
其嘯聚之故以山有銀場墮且深僻賊得以潛伏其

中郎命伐山通道具奏設縣治以便巡視其患遂息  
已而守臣以所獲賊屬俱論謀逆報功希賞公覈其  
實得首惡者十餘人悉縱之事竣而還賜白金綵幣  
甚厚丙子復奉勅巡撫遼東提督軍務鎮靜不擾遠  
近悅服天順改元春 皇上復位特召公還陞刑部  
左侍郎八月遂進尚書累膺金幣繡袍之賜公感

上知之益自力以圖報稱秋九月忽遘風疾而瘖即  
上章懇乞骸骨詔許之既而言語如常衆醫皆喜曰  
公疾瘳矣公獨不以爲然惟諄諄屬後事未數日疾  
果復作竟不起天順二年十二月十五日也享壽六

十有四 上聞訃震悼遣官致祭於其家復命有司  
爲營葬事公爲人直諒通敏寬厚坦夷處已接人一  
出於誠不立崖岸平居溫然和氣可掬及遇事能斷  
毅然不可奪而廉介之節始終不渝雖歷通顯服食  
無異於寒士尤以文學推重於時所爲詩文有集藏  
於家

榮祿大夫刑部尚書謚康僖陸公瑜神道碑

何喬新

中平  
庚子  
光緒  
之

刑部尚書省庵先生陸公以成化八年秋七月致仕  
歸四明家居十有七年爲弘治二年公有疾是歲九  
月十有四日卒於家享年八十有一寧波府以聞天  
子嗟悼命禮部考行易名賜謚康僖翰林院撰祭文  
下浙江布政司遣官諭祭其家府若縣助其喪事以  
歿之明年某月某日葬於鄞之西山桃源鄉之原公  
諱瑜字廷玉姓陸氏本顯項之子陸終之後代有顯  
者宣公贊以文學謀猷相唐中葉公寔其裔也宋有

諱升之者提舉兩浙鹽課徙居慈谿歷五世至諱元  
者又徙鄞之月湖西里公之高祖也故今爲鄞人曾  
祖諱義元台州千戶祖諱睿考諱應吉再世不仕皆  
以公貴贈資政大夫刑部尚書母陳氏繼母黃氏皆  
贈夫人公生於永樂己丑八月晦聰悟夙成稍長從  
鄉先生孫尚珩習舉子業有聲場屋弱冠登進士第  
奉使湖南徵發海艘水手舵工率禮慎法無毫髮誑  
吏議丁繼母憂服闋除刑部山西司主事時郎中仲  
閔爲之長知公爲偉器每舉洪武永樂間法比沿革  
告公且曰子它日必大用不可不知國朝舊典也故

公於律例條格究心焉及公大用每舉仲君之言戒  
屬屬官差盤內帑貨幣勾較精密中官無敢欺隱者  
遷廣西司員外郎正統九年歲旱英宗皇帝慮天  
下獄多寃勅公往淮揚蘇松等十七郡審錄繫囚公  
叅錯訊鞠務求其情廬州大家做匠構居室供饋甚  
薄匠恨之以里諺有丁倒戶絕之說乃以丁挿蒜瓣  
中置於梁間主翁得之執匠訟於府府坐匠魅魅當  
死公言律法造魅符書呪詛者以謀殺論挿釘蒜中  
非符書亦無呪詛法不當以坐匠它比其平反多此  
類諸郡繫囚得釋者三百餘人改從輕比者又千餘

人大司寇金公與僚屬曰陸員外充體朝廷欽恤之意矣遷貴州司郎中丁資政公憂服闋改四川司郎中景泰三年陞山東布政司右布政齊魯薦饑貧民相率持杖發巨室廩粟前使坐以強刦當歿者三十六人公曰民苦饑攘粟以延殘喘耳改坐白晝搶奪而三十六人皆不歿河決張湫朝命僉都御史徐公有貞塞之徐公委公督其役時工匠集者數萬公爲設方畧編荆爲筐實以土石沉而築之水患遂息尋轉左布政使天順二年冬以李文達公薦徵拜刑部尚書及廷謝英廟見公奏對洪暢進退雍容語左右



曰刑部得人矣公久居法曹練達國家典故凡有大  
獄屬官不能決者質於公則曰某時某所犯類此退  
索往牘閱之年時無少差時錦衣衛指揮門達怙寵  
作威弘農衛卒誣指揮李斌與其弟健謀反事下達  
鞠之達煅鍊以爲反狀已具奏請會三法司審問衆  
相顧莫敢異論公獨言其寃達怒語侵公公曰法司  
所執者祖宗之法耳吾何敢捨所執法枉人以滅族  
之罪邪達不從譖公欲出反者上知公無它曰彼  
欲重慎耳及奏上誅止斌兄弟而免其妻子曹欽反  
武夫希功者執其個人送官以爲逆黨凡數千人公

從容語都憲李公曰欽之反起於倉卒佃人相去或數百里安得與謀公柰何使數千人無辜而并籍其家耶李公以爲然於是佃人皆不坐上素重公或獵近郊或遊上苑輒召公從行禮遇優渥 憲宗皇帝初開經筵公與部卿侍講有白金文綺之賜成化三年夏尚書九載滿上疏乞致仕 上曰卿才識老成朕方倚任所辭不允復任五年忽感風疾甚劇 上遣中使臨問御醫療疾賜以酒米食物疾少間復乞致仕 上不允特免朝參仍理部事越兩月疾復作又上疏懇求謝事 上乃許之辭之日賜寶鈔千貫

公抵家以泉石詩酒自娛別號鑑湖後適聖慈仁壽  
太后徽覽禮成推恩致仕之老進公階榮祿大夫榮  
祿階一品非奉特旨不授公所被蓋殊恩也惟公端  
亮而有容寬裕而有制觀其容止醞籍進趨安雅知  
其爲有德者也爲刑部尚書十有五年其明習法令  
如漢薛瑄而無煩碎之失其練達典章如漢胡廣而  
無與世浮沉之譏其能斷大事如唐姚崇而扶救獻  
諫有不爲也屬官賢者禮之如賓友其險且暴者駁  
之甚嚴及其改過則坦懷待之不追咎其既往人以  
是德之門達素與公不合及遷敗言者欲真之歟李

文達訪公公曰達典制獄任情輕重不可謂無罪然  
斯紀綱馬順則有間矣文達然之達卒得不死其御  
史寇深暴戾自用每會審罪囚強辯巧詆衆無敢違  
者公徐一言據理正罪深不覺自詘

資善大夫刑部尚書謚恭毅王公榮神道碑銘

商 輅

成化甲午八月三日資善大夫刑部尚書王公以疾卒訃聞 上悼念賻新鈔萬緡賜謚恭毅命禮官諭祭有司營葬事公姓王氏諱榮字同節別號恕齋先世河東人唐時有諱仲銘者仕江西觀察使子孫因家廬陵之宜溪曾祖維熈妣劉氏祖子善累贈大理寺卿妣黃氏贈淑人父仲起累封大理寺卿妣康氏累封淑人公天資穎悟自幼嗜學正統辛酉領江右鄉薦壬戌第進士甲子授刑部主事戊辰陞員外郎

景泰庚午陞郎中公才識超卓推鞠詳明同官皆擢  
重之辛未陞湖廣布政司右參政壬申調河南所至  
郡縣獄囚淹禁公立爲辦之奉勅修理河灣措置  
有法民不知勞乙亥陞按察使紀綱振肅圜牆空虛  
天順初被誣去任老幼攀號如失父母時襄王赴京  
見之上問官吏賢否首以公對卽日省還迎者歡  
呼載道已卯賜諸旌異未幾以憂去民不忍別哭聲  
震野壬午陞都察院右副都御史巡撫陝西歲饑設  
法賑濟流逋復業尋改大理卿處斷平允人以不寬  
官屬才賢推援恐後甲申今上嗣位及開經筵俱

蒙白金文綺之賜成化癸巳陞刑部尚書革除宿弊  
疏陳十事咸切時政 上嘉納之諸司呈稟案牘填  
委裁決如流無不曲當其情明年忽遽疾 上命醫  
調治遣中官 存問兼賜酒米等物竟弗起距生永  
樂戊戌享年五十有七

刑部尚書董公方墓誌銘

周洪謨

公諱方字仲矩姓董氏其先太原忻州人高祖諱提  
禮曾祖諱才友祖諱興考諱政皆樂肥遯後祖考以  
公貴皆累贈資政大夫刑部尚書叔祖都永樂中應  
召募徙居潞陰公父母偕來公生於旅次暨長隨叔  
祖還析識先人兆域復歸潞陰爲縣庠生正統甲子  
薦秀京闕乙丑登進士第試政兵部聞父疾革急歸  
父旣瞑目復甦而喜俄頃卒公哀毀屢絕水漿不入  
口者五日寢苫枕塊不食酒肉者三年服闋授大理  
左寺副景泰辛未大理卿蕭公薦爲左寺正公用法



平恕克雪冤抑有巨室被盜東河人蔣傑與盜遇并執之訥弗能辨不勝捶楚遂誣服公緩其刑訊之證驗皆實始得免錦衣旗軍鉄堅與百戶謝海鬪傷腦奪銀簪官擬白晝奪財傷人者死公謂事起忿爭非造意攘奪從輕與金吾衛卒入內領官銅出中道竊銅板尺餘覘卒執之有司擬以盜內庫物律斬公謂物領出非潛入內庫盜者宜論監臨自盜得減從徒乙亥命往山西處囚太原民白政殺鮮人王選投尸汾河事覺政懷宿怨誣選妻私於已同謀殺夫獄已成公謂彼爲夫婦三十餘年生子十餘人何得至此

盡拘鄉鄰証驗政始服還妻得釋羅理妻爲盜所殺  
有司証劉達夫婦害之俱應減公至始白其寃得免  
事覺乃知殺之者達婿也其餘活死者情可疑者凡  
若干人天順辛丑陞右寺丞丁母憂起復陞右少卿  
甲申賜誥進階中憲大夫成化乙酉遷刑部右侍郎  
丙戌持節諸楚藩行冊封禮戊子賜誥進階通議大  
夫庚寅加授正議大夫資治尹癸巳進秩都察院右  
都御史甲午命公巡撫大同節制諸軍戊大同者無  
營房多僦民居公相地造屋若干衆論稱便戰馬數  
死者以千計公爲區畫不數月馬遂足尋遷刑部尚

書驛召還京辭職不允丁酉以衰老乞休致 陛辭  
復賜誥進階資政大夫公既致仕杜門謝客於南城  
庄百溪泉之左構綠野堂容與其中越六年無疾卒  
得年六十有八訃 聞贈太子少保

太子少保刑部尚書贈榮祿大夫少保諡莊敏

林公聰墓誌銘

彭華

成化十八年八月太子少保刑部尚書林公以疾在告上遣醫視疾賜白粳嘉蔬羊酒且命少閒即起視事閏月二十四日竟卒訃聞上甚悼惜遣中官視喪事賜鈔萬緡贈榮祿大夫少保諡莊敏命禮部尚書周洪謨賜祭又命葬及祔禪皆遣祭勅兵部給驛舟還其喪有司督葬又許仲子果終喪入國監待用皆殊恩也於是公春秋六十有八入朝四十四年歸然今之老成人負天下重望久矣故恩典駢蕃無

不以爲宜者公諱聰字季聰福之寧德人踰弱冠以  
禮經領正統三年鄉薦明年登進士入年授刑科給  
事中卽毅然以古直臣自矢日所不盡心以報國者  
非夫也尋丁外艱歸十二年起復首言福建銀課繁  
重宜省他賦役不然恐生變未幾寇果作十四年車  
駕北狩內外多事公侃侃在職知無不言劾光祿卿  
祭享太監王振家僮張伯通奸狀又劾總兵楊洪孫  
鍾不協狀時皆題之景泰元年轉都給事中內侍譚  
增駙馬石璟 景帝所親信者有罪皆劾之不避廷  
議迎復 英宗之禮或謂庸人變詐不測遣一車二

寒

馬往迎足矣公曰上皇北征爲宗社計也迎復禮  
宜從厚胡忠安出一紙袖中示公以葉文莊云此小  
人樸質之言大抵皆欲迎復從厚者吾欲以進如何  
王文端聞之曰此禮失而求之野然於此可驗人心  
同然進之是公舉手加額曰輒有此幸毋遲疑適王  
某至衆以質之王曰此投匿名文書類耳事幾寢公  
思之以聞迎復竟從厚三年奸臣建請易儲事下羣  
臣議公涕淚不署名忠義由是耿耿在人耳目四年  
虜酋也先遣使致書自稱大元田盛大可汗公言也  
先狀具主而自僭號宜與之絕然議是之卒不與可

汗號凡有所見奮筆直言或伏

陛下指摘爭論一

時多所警疾遷右春坊司直郎無幾內閣商學士輅  
言公不宜在散地遂復都給事中補吏科仍食六品  
俸凡視選必欲出至公吏部遷擢或不當意輒名斥  
論列有陳僉事永者陞布政以公言竟落守舊職執  
政或畏惡之諷御史劾公下吏簿責公姻戚爲教官  
用公言得近地公竟坐專擅選官當死罪高文毅胡  
忠安爲白其事乃得釋左遷國子學正天順元年  
英宗復辟起公左僉都御史山東歲命公賑貸公詢  
拔能官散詣村落給食及醫藥全活數十萬遷陞右

卷一百一十五

副都御史江淮鹽徒橫行公往擒其渠魁梟數人餘脅從則用輕典盜以寧息三年伏丁母喪歸四年奪情起復乞終制不許五年曹欽反殺右都御史寇深公署院事欽已就擒紛紛邀功者未已或夜取乞丐首公曰罪人已得首級真偽不可知爾後必生擒訊鞫毋得妄殺殺乃止欽所連坐多寃者盡釋之成化二年江淮旱人相食詔公撫之公奏借江南糧及支運糧儲數十萬給民食且與之糧是年有秋三年陞右都御史七年巡撫大同號令明肅勸懲有法八年以疾致政越二年召赴南京都察院視事且命兼



提督巡江又三載召爲刑部尚書未幾加太子少保  
其決獄不瑣屑善委任遇大事則反覆詳覈躬自筆  
削屬官咸心服以爲不可及凡大政會議亦多所剖  
決嘗偕太監汪直往覈遼東失機事事皆得其宜以  
報汪奴視縉紳獨禮敬公爲人恂恂和氣滿容身若  
不勝衣未嘗有疾言遽色及遇事則正色譴言確然  
有不可拔者祖彥昭爲平山丞考覲歷程鄉永豐餘  
姚玉山教諭江山訓導俱累贈資政大夫都察院右  
都御史

資政大夫刑部尚書致仕杜公銘行狀

楊廷和

公諱銘字敬修姓杜氏成都金堂人杜之先本出於堯周成王時有封杜城者因氏焉自杜洩避季平子之難奔楚三世至杜赫爲秦將軍十三世而至當陽侯預又十一世至膳部員外郎審言家於華審言之孫爲工部員外郎甫避亂入蜀晚年自蜀如衡相其子宗文從宗文之子復還蜀居青神號東山翁其後又有散居旁近邑者公其甫之後也曾大父諱興祥葆光不仕大父諱添禮父諱榮聰俱以公貴累贈資

政大夫刑部尚書祖妣張妣楊俱贈夫人公少有異  
質從鄉先生治尚書舉正統六年鄉試十年第進士  
授刑部河南司主事論決輕重能盡法意自尚書以  
下皆器重之總十三司章奏羣僚堂衆時有疑獄不  
決者皆聚而質於公如公言所治獄輒稱善歷階員  
外郎郎中他司郎中缺公嘗兼領其事至晚他司吏  
往往抱三四印歸公家公愈謙退不伐衆益賢之景  
泰六年尚書江公淵巡視南直隸河南山東等處舉  
公自輔有持身端謹事體精熟之語公感其知己亦  
爲盡力未幾奉璽書處囚貴州出滯獄數十百人責

州人謹傳以爲神丁楊夫人憂服除刑部移文吏部  
仍欲得公爲屬且奏請於上遂復除河南司天順四  
年甘肅邊遽告急朝命兵部尚書馬公昂行邊復舉  
公參議幕府已得請因事不果行尋陞雲南按察司  
副使誄賊吏剽弊政聲稱厥起未盡一年會有誤傳  
新任按察使呂困道卒者守臣交章薦公補其處遂  
授試按察使已而呂復任乃改公於貴州真拜按察  
使居三年部使者列上其風績請表異之陞湖廣左  
布政使湖廣爲東南大藩批號繁劇公裁汰庶務宣  
布德恩治行稱異等成化八年召爲戶部右侍郎比

至京陞工部左侍郎未幾轉刑部十一年按事襄垣王府未還會虜自黃河套入北邊寇鈔朝議舉大臣提督山西三邊軍務僉謂莫如公者遂以命之公出代州歷鴈門寧武至偏頭關徧行邊壘覽觀形勝時時召老兵退卒問以攻守之宜益市馬募兵補完虛損因建議偏頭關在山西窮處東連威遠西帶保德北接虜境猝然有警戍者出戰便爲虛邑宜設千戶所一領百戶所十就以戍兵願留者實之又言三關兵民雜處事多牽制官利乾沒於豪家勦卒占役於私室請置按察副使一員督治之俱從其議又於要

害處設土蓬堡之望高視遠二城久之虜知我有備  
遁去乃還朝奉 旨審錄罪囚有白金文綺之賜十  
六年按事寧府其還奏時人謂知大體明年以父憂  
去官終制仍舊任二十一年秩滿九載加正二品俸  
尋遷工部尚書掌大理寺事故事拜尚書者率上疏  
禮辭公曰事君貴誠虛讓非禮也獨不解公自刑部  
轉大理其所駁正一裁以法不嫌於專時論多之明  
年改刑部尚書 憲宗皇帝在位久明習政事尤慎  
重刑獄公時教飭其屬吏以人命至重勿以喜怒用  
法度足以正邦典而彰 聖德一時用刑號稱平允

明年以年至乞休優詔不允今上龍飛又聯得

旨朕初嗣位卿宜勉盡職務輔成治理豈可引年求

退未幾再辭上重違其意乃許之賜寶鏐二千貫仍

給驛以行公卿大臣設供張祖道崇文門外觀者榮

之既至家稍葺舊廬買田以爲子孫計燕休之室扁

曰敬齋兄弟賓客日過從爲樂當春夏時扶杖從一

二僮子課家人田作田父野老皆攜酒餉公公爲引

滿不辭人人感德而去刈獲時亦然閒入會府藩鎮

諸公皆趨候之公不任拜起之勞輒復還金堂優游

林下者蓋十有餘年近世蜀中大官壽祚之隆退居

之樂如公者不多見也公久典獄事明於法令而持  
中不苛惡賊深巧詆者善決大事諸司屬抱文書立  
案下羣疑滿前公徐以一言判之曰某當然退而相  
與議無不以爲然者皆服公之精敏絕人其爲侍郎  
時貴州畢節衛人有告都指揮林氏與其子雄不道  
者謂反形已具或者又從而張大之欲因以爲功朝  
廷遣科道并錦衣衛官按其事公謂使者曰我故嘗  
官於彼展之蕩侈則有之若他謀可保其必無使者  
既先入公言至彼按之果無所得展父子遂得減戍  
已而展聞公之有言密遣人致重賂謝公公曰我爲



國法耳豈爲汝家計哉峻拒之一無所受公天性至  
孝事尚書公左右順承不違其志待兄剛及弟欽友  
愛篤至從子亮紀浩俱撫教之以底于成得官皆至  
縣佐公氣貌魁頎與人交誠信可伏開口見心不立  
城府雅尚儉朴居家常衣布衣其夫人嘗謂曰公以  
大官被服如此得無近陋乎公曰我故布衣也在官  
服官服居家如故何不可之有其自  
句然至於  
周貧恤孤則惟義是從多費不吝也其女適漢陽李  
鳳凰歿公往弔之載棺及斂具以隨謂其女曰此我  
爲汝未亡人計也見者皆服公之高公臥病餘一年

一日少間具衣冠端坐召諸子曰吾入仕自壯至老  
勉於忠孝始終保全至此若等能讀書爲善不使家  
聲落莫吾歿瞑目矣言已告終已而復甦踰時申前  
言乃卒實弘治九年七月六日也春秋七十有八

刑部尚書椒丘何公喬新傳

蔡清

先生名喬新字廷秀姓何氏世家盱之廣昌宋寶謨  
閣直學士諡文定公坦之裔吏部尚書東園先生第  
三子也少多疾九歲始就外傳讀書穎敏過人年十  
一讀通鑑綱目輒了其大旨有問者備舉其首尾若  
道目前事聽者忘倦刑部尚書匡山魏公侍郎豐城  
丁公皆以偉器期之翰林修撰周君中規嘗至先生  
書齋見壁間懸新城朱文敬所寫丹鳳鳴圖中祝因  
歎文彬多能先生徐曰此非學者所當爲也中規異  
之因問所閱何書對曰陳子桎通鑑續編也曰子桎

書法視朱子何如曰先輩著述非後生所敢議然呂  
文煥之降元不書其叛張世傑之溺海不書其死節  
曹彬包拯之卒不書其官紀義軒則抹怪誕不經之  
談書遼金則失內夏外夷之義似有未當也中規大  
驚因白東園曰三郎學識不易及也景泰庚午赴江  
西鄉試時姑蘇韓公雍巡按江右欲私見之先生辭  
不往及入試主司天台章先生阮得其文擢置第一  
監察御史周君孔明以東園方典銓衡懼招物議乃  
移置第六明年會試禮部名在甲榜翰林學士江先  
生淵亦避嫌移置乙榜例授教職辭不就及東園致

仕廼登進士第觀政工部嘗奉使淮西巢縣令閭閻  
少學於東園以白金文綺爲贈先生力却之敬曰吾  
以壽吾師非贈君也先生曰子欲壽吾親因他人致  
之則可因吾致之則不可卒不受東園聞之喜曰吾  
兒如是吾無憂矣景泰七年春擢南京禮部主客司  
主事政務甚簡終日閉戶讀書宗伯姚公重之語人  
曰何主事方爲時用恐其不習於政奈何乃徵先生  
收糧先生平斗斛謹出納嚴勾稽而痛懲奸吏之侵  
漁者姚公喜謂先生曰推是以往無施不可矣會丁  
東園憂解任歸宋樞密陳文定公父葬廣昌世稱吉

壞其子孫貧甚欲鬻其墳爲東園宅兆先生曰暴人  
之父而葬吾父吾不忍爲也繼丁母夫人憂服闋改  
刑部陝西司主事先生盡心庶獄無大小必求其情  
武清農家婦牧牛於野二戎卒驅其牛去婦號而請  
之不予錦衣衛捕盜者執之以爲強盜送刑部議其  
罪先生曰此白晝奪人物非強盜也律當徒又有強  
盜舍逆旅分所劫彩緡遺主翁事覺巡徼者并主翁  
執之以爲同盜先生諷得其情曰此與盜分贓耳當  
與強盜殊科司寇陸公喜曰子慎刑如此不愧廼翁  
矣還本部廣東司員外郎錦衣衛隸廣東司其官校

侍侍衛親軍恣橫冒禁法司每役客之先生曰法者  
天下之公也有犯輒捕治不少貸繇是官校悚懼相  
戒不敢犯修 英廟實錄命各部採摭事當紀載者  
爲書上之司寇以屬先生及書上史館少保南陽李  
文達公閱之曰紀實而飾以文視諸司惟勝吏牘者  
大不侔矣還本司郎中錦衣衛百戶有逐其舅之子  
而奪其財產者舅子歿其孫訟于官指揮使袁彬囑  
先生抑訟者先生執不可悉奪財產歸其孫彬怒欲  
因事陷先生適覘事者百端搆摭卒無毫髮可指爲  
罪者先生在刑部久凡法比禁創具通其本末陸公

及侍郎太原周公新安程公泐水董公皆重之有大  
獄具必以屬先生章疏當上者輒使具草吏部尚書  
古曹李公知先生材且賢屢薦於朝陞福建按察  
司副使暨抵任浙寇千餘人壽寧等縣盜採銀礦所  
過剽掠先生募鄉兵擊之斬首數百級擒其魁浙寇  
敗走福寧土豪尤氏暴橫殺人出入以兵甲自隨縣  
官捕之輒族拒不服幾二十年先生設方畧生致其  
父子置於法福清薛氏以所居瀕海歲出諸蕃互市  
事覺遂聚衆欲爲亂先生掩其不備盡獲其渠黨海  
道以寧福安寧德銀礦久絕有司責民供歲課民多



夏  
山  
後  
院

破產先生具奏減二縣銀課三之二行部興化問民  
所病皆曰洪武初官以牛貸民耕而徵其租牛物故  
已久而徵租如故民以是病先生以聞遂蠲其租都  
察院副都御史滕公巡撫福建徵先生分巡汀邵延  
建先生徧歷諸縣訪民利病而興除之清流之歸化  
里介乎將樂沙縣之間民恃其險僻不供徭賦先生  
白滕公卽其地置歸化縣其民始奉法令龜山先生  
將樂人子孫徵其墳塋蕪穢其書院亦爲戎卒所據  
先生修其墳復其書院且繕廢寺腴田百畝俾其子  
孫耕以奉祀焉興番舶中官必領守太監分其餘財

遺三司先生力辭不得通受而輸之庫陞河南按察使福建都指揮僉事武成以先生薦授閩職及先生行以犀帶銀器爲贐先生笑而却之曰我知君君何不知我邪成慙而退河南大水民艱食舊制賑貸貧民至秋罷先生曰令賑貸止於秋者以秋成可仰也今秋田無收賑貸可已乎命郡縣如舊賑之至麥熟乃止流民入境無食者發粟爲粥食之無衣者以庫藏帛給之所全活不可勝計河南守薛昌鹿邑令胡宏祀縣令李文中皆以貪暴病民而有強援它使者不敢問先生劾其罪或徙或黜鈞州民趙甲飲于陳

乙酒肆乘夜渡河溺而歿甲之子訟於官謂甲與乙  
關乙殺而投諸河乙以鍛鍊慘酷自誣服坐繫數年  
先生獻之曰酒肆民居栢比使關必有聞之者肆距  
河且十里負屍投之必有見之者奈何以單辭成罪  
乎令有司驗甲屍腦皮裏有沙石忤作定爲溺歿遂  
破械出之都御史陽城原公招撫流民至河南引先  
生自助先是都御史項公驅逐流民歿者十餘萬及  
聞原公至皆逃匿先生馳至山谷委曲諭之流民咸  
泣願附籍者六萬餘戶兩親京師同親者多重載以  
遠權貴先生僦車以行所載書籍朝服而已陞湖廣

右布政使荆襄大水漂溺千餘家巡撫都御史劉公  
檄先生賑之先生躬自撫循發粟以續其食而給錢  
使葺其居民咸安焉荆民以徭役不均訟於臺劉公  
又檄先生理之先生驗其丁口登耗貲產厚薄列爲  
九等以輕重投役焉民咸稱便成化十七年冬十一  
月陞都察院右副都御史巡撫山西兼督三關兵備  
時山西連歲旱饑米價騰躍先生發倉粟三十萬減  
價糴之民賴以濟北虜寇邊先生伏兵仄溝營虜至  
輿戰斬獲甚衆陞左副都御史奉勅清理刑獄辯  
沉寃察隱慝咸當人心律重情輕者具以聞多得末

減召爲刑部左侍郎屢辯疑獄請託無所徇屬官畏其嚴莫敢恣睢者虜酋小王子寇大同殺巡將畿內驚駭紫荆居庸二關尤急先生奉勅巡邊相險阻

築城堡簡精壯礪器械爲戰守備嘗獲虜謀知小王子在邊守者多老弱又請選精兵問道出徇之會虜潛遁不果用山西大饑人相食迺徙他境者什四五上命先生往賑之許便宜行事先生請於朝

奏內帑并賣淮鹽得銀數萬兩又勸富室及僧道士得粟數十萬石遣司府官分部賑濟以者爲戒舉葬之又飭民疏溝渠而償以粟所活凡三十萬人招回

復業者十四萬人播州宣慰使楊愛與其庶兄友不  
睦友奏愛奢僭淫暴等罪且云有異謀 朝廷命先  
生卽訊囚愛以待 命先生言楊氏據有播州六百  
餘年其民知有楊氏而已一旦見其酋長囚禁羣夷  
驚疑恐生他變乞審驗虛實重者監候輕者發遣  
上從之既而訊鞠具得其情友實欲奪愛宜慰肆爲  
誣罔先生具以上 請且慮其兄弟相讐殺遷友它  
郡邊夷以安今 上皇帝卽位陞南京刑部尚書到  
任僅二月召爲刑部尚書先生在南都嘗言沿江廣  
洲率爲中官占據有訟者輒云買物進奉今 陛下

數  
可  
批

既罷貢獻乞以蘆洲給還軍民由是牒中官意及在  
刑部拒絕請託凡大小之獄一以法律從事或有以  
禍福皆不顧錦衣衛官校出入逮捕但齊駕帖到亭  
皆不與聞先生言舊制提取囚犯必給精微批所至  
比號乃行則矯詐無所託駕帖不必比號則真偽無  
由辨乞仍給批便又言京師大水恐內外刑獄有寬  
枉者乞選官審錄庶以弭火又言京師軍民習胡語  
服此亦伊川被髮野祭之類也乞出拘禁約 上皆  
從之兩以疾臥家 上皆命醫診治又遣中使臨問  
賜以酒米肴蔬屢疏乞罷 上不允然以執法不阿

羣小多不悅御史鄒魯等乘風誣奏先生不自辯但解印待罪且乞致仕既而有旨仍令先生掌印亦固辭及錦衣衛逮證佐鞫之知魯等所奏皆誣詞

上乃命先生致仕賣宅卽行抵家不接人事鄉人罕得見其面大理少卿屠勲及南京六科十三道累奏欲起先生權貴多忌之者竟不用宣慰楊愛聞先生致仕遣使致金銀爲壽并獻名梓可爲棺者先生拒不受或譏其近名先生曰吾道當如是也自初仕卽自誓不營利不阿權貴不以愛憎爲賞罰守其誓終身性剛介寡與歷官皆久而後還自少好學公退書



聲琅然聞戶外雖視事亦手一編不少置聞人有異  
書輒假錄之藏書三萬卷皆手自雋校所著有宋元  
史臆見周禮集註椒丘稿所編題有文苑羣玉唐律  
羣玉續編百將傳助賢琬琰集皆載於家

都御史林俊奏乞贈諡并援案欲例言諡當以文會  
有沮之者給事中吳世忠論曰蔣之奇嘗誣奏歐陽  
修後日太師文忠之贈諡之奇不能奪胡鉉亦嘗誣  
奏朱熹後日太師文公之贈諡胡鉉不能奪蓋誣善  
者羣小之私贈諡者萬世之公也廣昌知縣張深復  
論之詔喬新學行俱優始終全德贈太子少傅仍與

謚文肅時正德十三年八月蓋公論至是始乞而  
先朝實錄本傳謂喬新議法刻深及勸父引決以自  
全蓋出焦芳之曲筆也

刑部尚書何喬新

刑部尚書何喬新字廷秀江西廣昌人年十一通史  
學病陳涇通鑑續編卒曹彬包拯不書官呂文煥隆  
元不書叛張世傑溺海不書死節紀義軒附不經之  
談書遼金失夷夏之義爲修撰周旋所奇舉進士奉  
使淮西巢縣令聞徽嘗學於喬新父文淵欲以金帛  
贈卒不受授南京禮部主事復除刑部遷廣東司員

資善大夫太子少保刑部尚書彭惠安公韶神

道碑

林俊

弘治乙卯資善大夫刑部尚書致仕彭公從吾終於  
家訃聞孝宗敬皇帝哀悼賜太子少保諡惠安遣  
官諭祭公諱韶風儀其字其先自戊公五世居涵口  
而益積於體正於思孝二公則公祖父父也皆贈通  
議大夫都察院右副都御史祖妣陳繼林皆贈淑人  
公父故儒者代門生陳燮名舉資竟代償五百金產  
幾於盡父歿妣負口食之虞公從客間得役徒以續  
其旣景泰丙子舉鄉薦明年第進士爲刑部主事員

外郎郎中 憲廟朝疏言張夔不當爲僉都御史宜

用王紘李秉葉盛副人意言周遵不當以貴戚奪民

田傷國本宜還民再下 詔獄賴言官論救得釋爲

四川按察副使疏言藩府葬祭差中官勞擾行藩司

便爲廣東左布政使疏起陳獻章爲翰林檢討疏總

鎮顧恒取方物監舶章春請均徭六十戶充私貢非

宜俱見停減最後言梁芳第千戶德林僉烏花木擾

民忤 旨調貴州居九月擢爲都察院右副都御史

巡撫應天蘇松等處入爲大理卿坐論星變過直道

改舊職巡撫順天整飭蘇州等處軍務值天象示變

疏言時政及糧運數事 孝廟初臣僚交薦王端毅  
公及公數老人望當顯用端毅起爲吏部尚書公爲  
刑部右侍郎奉 詔巡視浙西劾罷守臣一人尋兼  
右僉都御史整理兩浙鹺政疏言浙西鹽利倍浙東  
而浙東亭戶抑配尤甚宜定折價之輕重及減溫處  
課額事竣還 朝劾鄒俠流民囹圄寘戶窮苦狀以  
進進吏部左侍郎與端毅並擬重辭人不救干以私  
庚戌彗星見天津疏言正近侍慎官爵厚根本減役  
錢其正近侍謂內臣言輕重能爲觸輻今利源盡出  
其手分例相沿虛名實支誰能詰之凡章奏允而後

下無復論奏是失政體也有犯多從寬免有歐人死  
不問有論歟尋原是失刑柄也第宅服用踰制蓋祠  
請地非分之求曲允無禁歟而葬至與銀捌千兩望  
折其氣以服其心職務終於所司威福必求已出未  
言午朝 祖宗勤政之典乞師其意惟議經邦急務  
如有大陞除有大舊異有大邊報工程囚犯於 御  
前評議可否不惟國是定事體熟而羣臣邪正優劣  
自辨孝廟嘉納爲刑部尚書安遠侯柳景總兵兩廣  
賊累鉅萬爲都御史泰絃所發公抵以法景挾賊曉  
於內降擠絃公執如初竟不能奪會早求言疏言會

議荆庶人奏及他奏間踰旬日方得 上旨恐涉少

斷內使王萌苗通高永犯死得免淨軍恐殺人不死

無復畏憚乞勤政守法官中府中爲一體昌國公墳

塋宜量減工程陵戶勇校等役宜量限優戶權瑄憚

厭之連摘曹屬紀遇林公公不爲勅以疾在告既連

喪濬濬二子密定憲三孫衰以浙果疏乞休 上敕

留再四命近臣以醫來視既之微丘去端毅又去公

益孤去意益失甲寅六月復疏者三 上憫公懇誠

特賜允命乘傳以歸有司月給米二石歲給人夫四

名爲國愛賢者猶望公卒佐 明天子興太平之治

御史宗彝等復羣薦之朝然公亦疾以老不復能當世責矣生宣德庚戌享年六十有六公間氣收之不闕而關之國家豐亨之運學以儒者爲宗省察性情清其心以求聖賢氣象澄澗以永人莫窺其際方不忤物廉不近名容禮若甚溫而嚴冷自不可犯弱冠出已意作長義攻舉業者人之鄉薦學故有贐金諸生輸納良苦公始卻遂爲故事鄉國物品在人在刑部屬屈儕輩直出其上四川樹植風紀燭伏稱神明開邑劉者與其族爭里役陰嗾安岳扈氏焚滅其家男女二十有一人歿府久不決公訊而服定遠曾者



乘其從兄避盜掠家財以去比覺聚羣小夜殪之盡  
其家一十有二人歿陽訴於公公訊又服淫祠多見  
焚毀司有五顯廟碎其像易以清獻趙公神主寅案  
相觀濁風爲之一變在廣東廉問疾苦而罷行無倦  
挺身當怨必欲事事不涉厲民補吏以書工拙才遲  
敏爲屬大小劇易之差寄請杜絕公堂宿垢條以盡  
貴則又然巡撫一居鎮靜吏不敢欺士民相安其愷  
悌凡歷四省兩直隸人愛若親父母巡歷願先入爲  
快留則樂去則憂別則走送泣下惟不利於貂璫及  
爲眉州宜興二柄要不樂宜興至歿猶追憾予巡視

江西適椒丘物故爲疏請諡并致不平於公畧曰臣聞彭韶何喬新在刑部屬並負時名積官俱至尚書韶忠亮懿醇喬新貞方恭慎又各儒術精究吏事熟諳得古人之深以同任天下之重當時言完名純德文學政事節槩屬心焉韶歿有贈有諡具悉聖天子優異名德盛心然韶文有也忠與正與肅與獻則又有也不知議諡之時何取惠安之義率不類其爲人無足服中外之心以收後世之信乞下廷議易諡與椒丘兼畀以文事雖不行士論稱爲快嗚呼公則固遇矣道大行矣然非究其至也端毅椒丘我公弘

治初年三大老盡矣。由今視昔，其有餘慨焉。公所著有從吾滯稿若干卷，奏議一卷，名臣錄賢三卷，政訓一卷，天曹日錄，秋臺錄，北岳代行錄，各若干卷。續修蒲陽誌十卷，成都誌二十五卷。

光祿大夫柱國太子太傅刑部尚書贈太保諡

康敏白公昂傳

吳寬

公諱昂字廷儀姓白氏常之武進人也少入縣學學業精敏出同輩景泰丙子中鄉試明年天順丁丑遂登進士第年始二十三時英宗初復位更新庶政重言官之選明年擢公南京禮科給事中公初授職已有才名俄丁家艱甲申服滿改刑科成化戊子轉左給事中辛卯進都給事中皆刑科公以言責自任南京戶部尚書張鳳不法公劾奏鳳爲大臣不加之罪何以示威有旨械至京已而釋之鳳雖幸免而一

時多公直 憲宗初卽位值北虜犯邊經筵輟講公  
上言帝堯不以洪水之苗而不明峻德太王不以昆  
夷之侵而自殞厥問今日正 皇上講學以爲修德  
之助之時不宜晏安以隳聖德他日有黃霧之異又  
上言六事皆當世要務其尤切者曰謹命令以全大  
信謂 陛下卽位嘗詔罷貢獻矣而貢獻者不絕嘗  
罷織造矣而織造者自如嘗禁權豪不得中鹽矣勢  
要不得求地矣京城內外不得創造寺觀矣而皆不  
爲衰止願守大信勿以親倖而易其度可也監察御  
史謝文祥以言事得罪不可測公率同列救之謂文

祥所言雖狂妄然爲御史非出位而言且其心無他  
宜含容之以開言路疏入文祥得降用其餘獻納者  
尚多然公務持重不屑屑以小事論至於事干刑獄  
者得以叅駁亦不瑣瑣摘抉人小疵故人皆稱公知  
大體而名益起壬辰擢應天府丞京民苦差徭繁重  
多破家公至適署掌府事爲定役法人稱均平乙未  
擢南京大理寺少卿辛丑進南京都察院左僉都御  
史奉勅兼管操江仍巡捕沿江盜賊時有劉通者與  
其黨操舟販鹽并行劫奪出沒江海間勢熾甚公調  
士卒追捕至太倉分兵截其要路知通窘迫示以威

信諭以禍福謂如自首服許以不死通知公長者遂  
挺身來歸叩頭感泣公戒諭已仍縱之歸通卽率其  
黨以降特械通至京凡脇從者悉釋不問事平公復  
奏沿江要害守備等官遇有警當互相應援又請降  
關防印記以便行事皆從之未幾陞本院右副都御  
史尋掌院丁未陞南京兵部左侍郎奉勅修鳳陽皇  
陵并白塔壽春諸墳時當荒歉衆以興大役不堪公  
均工節用勞心調度越三年功遂畢與初計省其半  
以其餘財仍行賑卹民反獲濟今上之二年爲弘治  
己酉河決金龍口漕運多阻召公往治改戶部左侍

郎公奏南京兵部郎中婁性從行始至河南相度水  
勢慮水復趨張秋發卒數萬自陽武封丘祥符蘭陽  
儀封數縣築長堤捍之遂導河自中牟洪口至尉氏  
下潁州經塗山合淮水入海又修汴堤令高廣如一  
上樹萬柳使不崩頽又浚宿州古睢河入運道以分  
徐州之勢又築蕭縣徐集等口以殺汴徐之勢又自  
魚臺歷德州至吳橋修古河堤又自東平至興濟鑿  
小河十二道引水入大清河及古黃河以入海河口  
各作石堰相水盈縮以時啟閉於是河竟不爲害而  
漕運獲濟公又見高郵之覽社湖風浪時作多覆舟



或舟觸岸輒壞議卽其東開複湖以避其患河成舟  
安行無險名其河曰康濟人思公惠別名曰公堤治  
水事竣改刑部侍郎辛亥署掌都察院事遂陞右都  
御史嘗言風憲官爲朝廷耳目凡巡行一道當詢屬  
吏賢否之狀上於吏部及本院部院據其詞以行黜  
陟且以所上之虛實爲御史之黜陟庶幾各得其實  
而人有所勸懲也又天下軍衛士卒消耗宜預覈尺  
籍之數畀清軍御史使按籍搜考以絕埋沒諸弊又  
天下奏報舊傷荒稔及戾至上不知國計之當儲下  
不知民隱之當卹由有司以其地濶遠可以欺設之

故宜令御史預遣人踏勘田土高下之則造爲圖冊  
設有水旱可據此以蠲稅糧而里胥無所容其奸也  
御史李興巡按陝西以酷刑處死無敢爲言者公曰  
興爲吾屬豈可避嫌而不爲一言乎乃率衆大臣上  
言興之暴固可罪然非殺無罪者今以死處興設有  
故勘故殺者又將何以加之奏上興得免死癸丑陞  
刑部尚書公心素厚斷獄不苟嘗曰秋霜之肅何如  
春陽之和乎數論屬吏以人命至重尤當謹重獄故  
冤抑者旣多平反其可矜疑者亦多從末減每以律  
爲萬世之法條例爲一時之宜今更得爲奸皆條例

繁冗之故因詳定爲若干條奏上頒行內外而奸弊始少甲寅尚書一考加太子少保戊午東宮出閣進太子太保積階至光祿大夫勲至柱國以其官贈曾祖均禮祖思恭父珂竝光祿大夫柱國太子太保刑部尚書曾祖妣錢氏祖妣蔣氏妣鄭氏王氏竝贈一品夫人配蔣氏封一品夫人公居官四十年勤勞不倦濟以精力事至輒辦及決大事往往以從容數言裁定多不失正其待人氣溫色愉言出如恐傷之下至輿皂有過未嘗輕加笞辱屬吏以公事獲罪必爲掩覆骨救得免乃已人以急難來告加切於身所以

排解之者尤盡其力故感其恩者不特鄉里親友而  
已公官三品時其弟昇早世以其遺孤垣奏爲太學  
生嘗置義田立義學凡族人之貧而幼稚者以養以  
教皆得其所其厚於宗族又如此今上知公德寵遇  
甚厚屢有金織文綺之賜或病在告輒遣御醫診視  
并遣中貴人賜以酒饌等物庚申以星變再上疏引  
咎避位情甚懇切上不得已允之特進太子太傅致  
仕馳驛而歸令有司舉優老之典仍賜璽書所以褒  
美之者尤重及行士大夫傾朝祖送人以爲榮卒年  
六十八上聞訃悼惜爲輟視朝一日贈太保諡康敏

遺有司諭祭者九仍命治葬於某處新塋惟白氏之  
先爲河南人從宋南渡占籍武進歲久爲大族

光祿大夫柱國少保兼太子太保刑部尚書贈

太保諡莊懿閔公珪墓誌銘 王 鑒

昔者孝宗朝其大司寇曰閔公諱珪字朝瑛其先有仕宋爲將仕郎自汴來家湖州之烏程六世祖德淵歸安教諭曾祖諱性祖諱綬考諱節皆以公貴累贈光祿大夫柱國太子太保刑部尚書曾祖妣袁氏祖妣謝氏朱氏妣嚴氏皆贈一品夫人嚴夫人爲國初工部尚書諱震直之孫尚書醇德懿行簡在高皇公之生也人以爲有外祖之風焉天順甲申登進士選授山東道監察御史屢劾大臣之不法者罷之成化

六年擢江西按察副使已而改廣東進按察使虔嶺  
介南雍南安間三境爭田不決公方會勘衆忽嗾呼  
爲變人勸公少辟公不動徐爲處決令下兩境胥悅  
散去新會民嘯聚山谷爲亂公出諭以大義貫其逋  
負遂安堵如故二十一年江西南贛盜起擢公都察  
院都御史巡撫江西至則舉廉黜貪勸令薄賦具疏  
盜賊之作皆巨室是由欲連坐之仍革豪右橫取之  
弊京宦由是多不悅會妖人李孜省得倖因言公不  
勝任左遷廣西按察使弘治初復公都察院都御史  
巡撫畿甸經理儲備修濬城壕尋進刑部侍郎四年

以都御史總督兩廣軍務番萬瀧水柳慶平樂徭獫  
相繼爲亂督其下討平之其討古田也都督馬俊及  
叅政馬鉉敗歿時以致敗自倭等公引咎自劾時議  
又欲濟師公謂罪自首惡乃設重購緝之已而賊果  
自縛以歸公又歸功於下安南使臣奏入貢道憑祥  
龍州輒爲所梗詔下公處分公曰是亦各有罪焉乃  
行安南無得挾私貨憑祥無得阻貢物二夷爭遂息  
公在兩廣通行鹽之地而軍儲以濟立定順長官司  
而蠻人不爲變某年進南京刑部尚書尋改左都御  
史掌都察院事加太子少保十三年遷刑部尚書公



前後在法司屢治大獄皆會切情法加以仁恕樂工  
哀林以罪庾死獄中選人以刑部郎中丁哲濫致之  
死也事連御史陳玉下廷議時以事出中貴相顧莫  
敢發公獨擬如律及吏徐珪以死辨哲冤并下獄深  
治公又執如初竟俱從末減遼東都指揮張天祥襲  
和虜爲功大理少卿吳一貫當其罪死會天祥死於  
獄 孝宗大怒親鞫於廷欲置一貫重辟公與都御  
史戴埴進曰一貫推按不實罪當徒 上怒不解公  
力諍曰法如是足也一貫罪止貶官宣撫逮妖人李  
道明蔓延百餘人巡撫者欲張大以爲功公獻罪止

道明餘悉縱免正德初逆璉用事公遂請老詔允仍  
加少保乘驛以歸與與息祿米有加焉猶以公德厚  
故也辛未十月十五日以疾卒壽八十有二

故刑部尚書致仕東湖屠公勲行狀

顧清

公諱勲字元勲姓屠氏先世嘉興海鹽人後海鹽析  
平湖故今爲平湖人別號東湖從其地也祖諱湘考  
諱機俱贈資政大夫刑部尚書祖妣楊氏妣陸氏俱  
贈夫人公少穎異該覽羣籍爲文辭典瞻閎肆天  
順壬午試鄉闈時年十五提學副使篠庵張公奇之  
謂可魁一省既而下第篠庵揆落卷得公文稱嘆久  
之曰考官主偏見而不識義理茲士之不遇命也由  
是兩浙皆知公名成化己丑權進士授工部都水主

事分司清江浦督修造運舟持廉秉公通融物力未  
幾百廢具興有題詩驛亭以美其事者總督漕運沐  
永張公鵬豐城李公裕總理河道三原王公恕交章  
薦滿考改刑部歷員外郎郎中所處皆劇曹剖決如  
流而手未嘗釋卷嘗曰士當無書不讀無事不究其  
自勵如此故所至皆著能聲尤爲尚書林公季聰所  
倚信凡大獄有疑及事干權近者必舉以屬公京師  
無賴子曰季勝者結偵事官校誘其主之子福爲私  
鑄而發其事蓋將欲其產也獄成福減死戍邊衆知  
其冤而莫敢問林密以咨公公毅然曰刑將以弼教

也尚何顧索其卷爲直之以福之罪罪勝而歸其所  
有京師人盛稱之都事林某倚中人構訟蟠互不可  
解侍郎盛公曰非屠君莫能辦也公覈實奏上有  
旨下錦衣衛覆辯蓋其人將誣構公然卒從公奏奸  
黨皆得罪至於勘吉安之酷吏辯大同之冤獄典刑  
以正公論以伸而公直聲勁氣隱然於朝著矣甲辰  
陞南京大理寺丞在公卿間年最少而風采凝峻議  
論明正雖素囁強號不下人者皆敏祗敬服焉弘治  
辛亥擢大理左少卿始至上言十事多見采納若著  
月疏決囚徒兩京一體五歲一遣官審錄州郡刑獄

署爲定令而方石謝公之起用亦自公發之也漳州  
溫文進作亂朝廷憂之公奉命往視梟其首惡而散  
其黨與一方帖然是夏方苦旱訖事而兩閩人至今  
稱之甲寅擢都察院右副都御史巡撫順天等府兼  
整飭邊備公常以京城近輔役重賦煩彫敝已甚而  
宛平大興二縣所故庫夫壇戶旂夫羊冰灰戶等役  
動以數千計昌平縣在諸陵下供億浩穰而計丁  
養馬與諸縣等尤爲繁重乃條上區畫倍加存撫人  
以密雲抵懸有警救援不相及潮河川積石漫衍守  
戢爲艱黃花鎮拱護諸陵而守備單弱奏分薊州

爲中路以密雲建昌爲東西二路使互相策應於潮  
河川作捨城虎落且礮石布蒺藜鑿坑害而於其內  
梁石爲城蕃育人馬於黃花鎮增置營壘及戍卒若  
千人三路旣分潮河黃花皆有備由是兵勢聯絡賊  
不敢犯至今賴焉熊兒峪有寄操騎兵營去水十餘  
里鑿井數丈皆堅石馬日止一飲馱水至用十錢坐  
此困弊猪圈頭關地平行不當阨要每春夏雨水汎  
溢營壁傾圯綢繆路修築兵人苦之公至嘆曰無水  
而安營捨要地而屯沮洳皆兵之忌也乃奏移寄操  
營於熊兒峪之南平谷移關於猪圈境外之南北水

峪兵旣得水又有出境耕稼之利歲省卒戍數百人  
軍中歌焉寶坻白龍港出銀魚歲以供薦中官乘勢  
需索民不堪命麻峪山在極邊而出銀礦鎮守以密  
旨索之公力言其不可有 旨戒約取魚者而礦事  
卒不行民深德之丁巳轉刑部侍郎時壽寧侯與河  
間訟莊田而民亦以人命愬公奉 詔覈實辯其誣  
罔而歸田於民且言食祿之家不當言利况母后毓  
聖之鄉而與民爭尺寸之地尤非所宜同事中官錦  
衣皆難之而公奮不顧然辛蒙施行人尤以爲難丁  
酉艱起復改左副都御史復侍郎乙丑陞右都御史



正德初上郊祀藉田幸學三事拔據經傳傳以時事  
歸其本於講學而以宋儒真德秀大學衍義一書爲  
講學正心之要乞常以進講識者韙之丁卯陞刑部  
尚書時逆瑾用事乞奏請必先關白公執不從曰  
如此是二君也瑾用是銜而公亦力求去加太子太  
保玉帶麒麟服以歸命有司月給俸四石歲給輿夫  
四名終其身蓋公之立朝有始終大節而 上之待  
公亦厚矣公生正統戊辰卒正德丙子年六十九

榮祿大夫刑部尚書諡莊僖韓公邦問墓誌銘

謝 丕

嘉靖庚寅秋八月七日刑部尚書致仕進階榮祿大  
夫宜庵韓公以疾卒於家訃聞 上震悼遣官諭祭  
者再命有司治葬事錫諡莊僖蓋異數也公諱邦問  
字大經別號宜庵宋魏國忠獻公之裔居會稽自台  
州上蔡書院山長諱懌府君始曾祖考諱諤曾祖妣  
任氏繼褚氏祖考諱良可建寧縣典史贈奉政大夫  
襄府左長史祖妣張氏贈宜人考諱弼號衡軒襄府  
左長史妣璩氏贈宜人繼妣王氏封宜人衡軒公德

學純懿弗究用以貽厥後公其冢器也少穎悟異常  
年十六以宦籍充襄陽郡庠生領成化戊子鄉薦己  
丑登進士第授大理寺評事詳慎公清綽著時譽乙  
未陞寺副奉勅慮囚四川釋寃獄九十餘人戊戌陞  
寺正未幾陞淮安府知府淮當南北要衝民苦供役  
公隨事節省雖中貴往來不敢過需撫臣至者皆重  
公漕務悉與商決江北四郡多滯獄泗州官軍嘗誣  
奏無辜逮歿者衆屬公辦理咸得其情他若集江南  
之漕卒禁僞券之私醴不動聲色而人自畏服取吏  
以法愛民以仁淮民至今稱之丁未陞陝西左叅政

分守關南士有餘糧民亦安堵弘治辛亥陞江西右布政使癸丑陞四川左布政使時父長史公及繼母王夫人方自襄返越公每以不得迎養爲恨甲寅七月聞繼母夫人喪冒漲卽行觸險若平地人以爲孝威乙卯繼丁外艱戊午服闋補廣東所至有惠政已未陞都察院右副都御史巡撫江西時洞民負險爲盜歲久蔓延莫能制公奏立土官宣布威德一方遂寧時遣宦官駐饒燒造供御莞器公力言小民凋弊之狀可憫先王恭儉之節當師上爲感動中止癸亥以三載滿考獲加贈祖考及考皆如其官祖妣妣繼

姚皆爲淑人公雅性直遂不能與時浮沉爲當路者  
所沮抗章請老甲子復起巡撫河南中旨取樂工公  
弗遣上疏至引放鄭聲爲戒詞甚剴切亦見俞允正  
德丙寅陞南京大理寺卿戊辰陞刑部左侍郎時逆  
閹劉瑾惡不通款陞刑部尚書致仕欲假他事中傷  
而卒不能有所加初衡軒公將家於襄公旣貴丘隴  
恒在念而衡軒公歸志亦決遂別築爲迎養地至是  
復取先世雪應佳話建瑞白堂日與耆舊觴詠取娛  
今上龍飛兩詔進階榮祿大夫公狀貌魁梧屹若山  
立舉止有常言笑不妄作字必楷居過城市而軒蓋

罕出入然郡邑大夫及過客以國典民隱就質者則  
響答忘倦故識者謂公身雖不出而表俗澤物之功  
自不可泯性善飲未嘗有醉態接賓客未嘗有惰容  
恭儉清慎終始一節望之者知其爲大臣碩德重望  
鎮服鄉閭者蓋三十年焉嘉靖庚寅八月一疾而逝  
閩郡無貴賤大小咸思其德而痛其亡也奔弔如不  
及者距生正統壬戌三月三日年八十有九矣撫按  
諸公及郡守洪公申奏恤典有所謂發身科第位在  
六卿歷事先朝忠誠素著致仕二十餘年非公事未  
嘗一入官府鄰居數十萬戶雖燕見未嘗不着衣冠

出言俱有成章舉步不失尺寸杜門課畊深山守靜  
誠鄉邦之典刑明時之元老也此雖未足以盡公之  
梗槩而公之素行見信於人者亦畧可見矣

資政大夫刑部尚書遠齋王公鑑之墓誌銘

顧清

正德己巳刑部尚書遠齋先生王公謝政歸山陰越  
十年己卯秋七月三日考終於正寢年八十先生諱  
鑑之字明仲別號遠齋其先琅邪人永嘉南渡居會  
稽山陰山陰之王祖內史羲之先生其後也祖君瑤  
父詵號晉齋俱隱弗仕俱以公貴累贈資政大夫刑  
部尚書祖妣鄭氏妣成氏俱累贈夫人先生以正統  
庚申冬十一月庚戌生六歲而孤哭泣踴擗能如禮  
見者奇之讀書日記千言不待講說而知其大意十



三作經義出語已驚人時家甚貧連丁內艱日益落  
伯兄鎮之欲使助已爲生事數沮抑之先生志益堅  
學益力備更劬苦手未嘗去書成化辛卯卒以明春  
秋取鄉闈高第再試禮部不利不爲沮戊戌登進士  
出宰元氏召入臺爲監察御史按貴州弘治己酉推  
董南畿學政癸丑擢大理右寺丞進少卿僉都御史  
再進副都正德初陞南京刑部右侍郎改北京未上  
轉左戊辰陞刑部尚書明年乞致仕先生在元氏有  
惠於民旣爲京官民以事來者必踵門拜謁如見父  
母嘗使過其地老弱扶攜迎路去復追送之數十里

不絕有泣下者在南畿嚴考校公去取聲威肅然初  
若不可犯已而講論經義指授嚮方亶亶不少倦聞  
者興起南方論提學自浮梁戴先生廷珍廣信婁先  
生克讓蘭亭司馬先生通伯後必以公爲稱首焉爲  
僉都經略紫荆諸邊關爲副都撫治鄖陽再撫湖廣  
皆有政績可紀及爲尚書恤逆瑾竊柄事多掣肘度  
不爲所容遂引年去上不能畱賜玉帶以寵其行比  
卒命有司治葬賜祭皆如例縉紳榮之先生風儀峻  
整秀眉長目白哲而美髯見者傾竦而性孝友篤於  
倫叙雖失愛兄嫂事之益恭謹兄子淵業舉不就又

習醫先生爲之延引得爲醫學官遂以有立李氏姊  
之子澤民周氏姊之子濟皆攜之官所教養之及長  
皆爲之婚娶女皆爲治套具擇良士歸之在官遇鄉  
人雖甚寒暑必冠帶以見有所干請雖不苟循亦降  
意撫接或以事質問則盡誠告之故人敬而不怨歷  
官內外清謹如一日雖居臺省位常伯至老家無長  
物田不滿頃時尤以爲難嘗謂人曰希聖希賢之事  
我未之能然未嘗一日不學爲君子未嘗敢一置其  
身於不善之地見仕途有品節權門者則深挾歎息  
曰士患不能得死所耳窮通禍福有命焉此身一失

胡可復也先生之所見如此則其知幾勇退克保始終以有今日豈偶然之故耶

光祿大夫柱國太子太保刑部尚書諡襄惠洪

公鍾墓誌銘

王守仁

特進光祿大夫柱國太子太保刑部尚書兼都察院  
左都御史致仕兩峯洪公以嘉靖二年四月十九日  
薨年八十有一矣訃聞 天子遣官力諭祭諡襄惠  
賜葬錢塘東穆塢之原其嗣子澄將以明年乙酉九  
月十五日舉葬事以幣以狀來請銘維洪氏世顯於  
鄱陽自宋太師忠宣公皓始賜第於錢塘望族八世  
祖諱某二仕宋爲浙東安撫使元興避地上虞曾祖  
諱榮甫祖諱有恒迨 皇朝建國遷復還家錢塘有

恒初名洪武興忌者上書言其名犯年號 高皇帝  
視之曰此朕興之兆耳御書有恒易之父諱薪徽州  
街口批驗所大使自曾祖以下皆以公貴贈太子太  
保刑部尚書妣皆贈一品夫人公諱鍾字宜之自幼  
岐嶷不凡成化戊子年二十六以易經領鄉薦乙未  
舉進士授官刑部主事諳習憲典時相繼爲大司寇  
者皆耆德宿望咸器重禮信之委總諸司章奏擬議  
太獄取裁於公聲聞驟起庚子陞員外郎仍領諸司  
事癸卯丁內艱丙午起復陞郎中尋應因山西丁未  
江西福建流賊甫定公承命往審處之歸言福建之

武平上杭清流永定江西之安遠龍南廣東之程鄉  
率流移混雜習於鬪爭以武力相尚是以易閭而亂  
譬若羣豺虎而激怒欲其無相攫噬難矣宜及其平  
時令有司多立社學以訓誨其弟子銷其兵器易之  
以詩書禮讓庶幾潛化其奸宄時以爲知本之論弘  
治己酉陞江西按察使副使癸丑陞四川按察使所  
在發奸植伏無所撓避而聽決如流庭無宿訟由是  
豪橫屏息自土官宣慰使皆懔懔奉約束安氏世有  
馬湖恃力驕僭爲地方患公從容畫策去之請吏於  
朝遂以帖定丙辰入覲陞江西右布政使丁巳轉福

建左布政使著績兩省戊午陞都察院右副都御史  
巡撫順天等府兼整飭薊州諸邊備時朵顏虜勢日  
猖檄公以邊備積弛乃建議增築邊牆自山海關界  
嶺口西北至密雲古北口黃花鎮直抵居庸延亘千  
餘里繕復城堡二百七十悉城沿邊諸縣官無浪費  
而民不知勞自是緩急有賴又奏減防秋官兵六千  
人歲省輓輸犒賞之費以數萬創建浮橋於通州以  
利病涉毀永平陶窰以息軍民橫役之苦奪民產及  
牧圉草場之入於權貴者而悉還之遠近大悅名稱  
籍甚然權貴人之扼勢失利者數短公於上遂改



雲南巡撫再改貴州頃之召還督理滇邇兼巡撫鳳陽諸處正德丁卯陞右都御史仍董漕政戊辰命掌南京都察院事尋陞南京刑部尚書己巳改北京工部復改刑部兼都察院左都御史加太子少保 賜玉帶庚午特令出總川陝湖河四省軍務時沔陽州庭水寇丘仁楊清攻掠城邑其鋒甚銳官軍屢失利公至以計擒滅之藍五起蜀與邵老人等聚眾往來寇暴川陝間遠近騷動公涉歷險阻深入賊巢運謀設奇躬冒矢石前後斬獲招降以十萬擒其渠酋二十八人露布以聞土官楊友楊愛相仇激爲變衆至

三萬餘流劫重慶保寧諸州縣公隨調兵勦平之復其故業朝廷七降勅獎勵賜白金麒麟服進太子大保公辭不獲則引年懇疏乞歸章七 上始允之聖諭優獎賜馳驛還仍進榮祿大夫錄其孫一人入監公既歸築兩峯書院於西湖之上自號兩峯居士日與朋舊徜徉詩酒以爲樂如是者十有一年嘉靖改元之壬午朝廷念公壽耆 詔進公階特進光祿大夫柱國賜玄纁羊酒遣有司勞問士夫之議者咸以公先朝之老抱負經濟年雖若邁而精力未衰優之廟廊足倚爲重思復起公於家而公已不可作矣

太子少保刑部尚書致仕晉階榮祿大夫劉公

璟墓誌銘

楊廷和

公諱璟字德輝姓劉氏世爲鄆陵人曾祖諱聚有隱德祖諱義父諱海俱贈太子少保刑部尚書祖妣田氏母段氏俱贈夫人公生有異質弱冠補學官弟子員同邑司徒張公謝政歸一見器之曰公輔器也他日名位當不下我東吳劉欽謨時提舉河南學政試居優等當廩公以讓同學之貧者曰助之養也成化十年舉於鄉明年第進士試政刑部當外補司寇林莊敏公疏畱本部理刑授主事十九年陞本部署員

外郎慮囚江南多所平反又明年署郎中充副使

冊封蜀府二十二年陞松江府知府洗手奉法督率吏民勤職業勸農桑修水利敦士習舉人宋論凶戾狹人前守莫能治公置之法豪右皆斂迹海上有城隍威靈太守廉明之誦郡人張某嘗爲鄆陵學諭公所從受業者致仕家居非公事未嘗一至郡齋公常候之問政有疾公昕夕往視自進湯藥比卒爲持心喪其舊第久鬻於人出俸金贖歸其子松人至今兩賢之丁外艱改太原府惠綏窮民如在松江時再陞四川叅政漢州屯軍殺人爲亂巡按御史欲調兵

勦之公曰是不可激親往招諭之首惡就擒亂遂定  
以內艱改山西隨御史按澤州宗室有訴州守者袖  
刀截耳以脅御史衆皆走避公挺身入諭以理法引  
臂出之血流其衣聞者壯公之義十八年陞山東右  
布政使正德元年轉左轉別宿盜御史嚴而賦民寬  
部使者交薦之明年擢右副都御史巡撫宣府事事  
務存大體罷諸苛細條賢人以爲便 賜金緋衣一  
襲勞之未幾召爲刑部右侍郎大同人有訴將官不  
法者 命公往勘奏復稱 旨四年轉左 尋階尚  
書時迺瑾專政毒流縉紳公委曲調護裨益亦多五

年以寧夏平加太子少保 廷臣會鞫逆瑾有微斥  
瑾者輒反脣公厲聲叱曰朝廷有太法在尚爾私慰  
邪次訊諸奸惟允 上方委用公而公遽以老請得  
俞旨乘傳歸歲役有隸月餽有廩皆異數也公歸自  
扁其所居之堂曰怡閒因以爲號與親舊日觴詠相  
樂也七年流賊之亂燬公廬詰勅俱焚命補給之仍  
優卹其家今 上龍飛覃恩進階榮祿大夫嘉靖元  
年十一月十六日晨興忽蒸香危坐命長孫婿程侑  
書遺言教諸子勉爲忠孝不及家事書已就枕如安  
寢者明日遂卒固無他疾也得年七十三訃聞命禮

部諭祭者再工部治葬事

明故光祿大夫柱國太子太保刑部尚書張公

子麟墓誌銘

嚴嵩

公諱子麟字元瑞其先代州人永樂中以間右徙實  
真定遂占籍藁城曾祖玘祖得才父欽皆隱弗仕以  
公貴贈封皆光祿大夫柱國太子太保刑部尚書母  
劉氏生公穎敏異常中十九舉於鄉登成化甲辰進  
士授南京大理評事陞寺副寺正凡居聖寺十年擢  
守汝寧歷山西叅政河南布政使都察院右副都御  
史巡撫湖廣入爲刑部侍郎晉尚書加太子太保公  
歷事四聖更踐中外四十餘年其在聖寺剛直精



愼刑讞取正無所依避以平允稱汝寧之政訟平賦  
均膏濡弘洽報政則拜 孝皇燕服之賜解任則遣  
汝民銘頌之思時以爲天下循良之首山右澤潞等  
郡歲饑公志切焚溺濟以便宜亟於頌廩緩於稽奏  
所活民以數萬計厥後撫荆南值凶歲復以行諸山  
右之法賑之所活民又四十餘萬急邊圉謹儲備戒  
戎律飭官常撫居勦叛舉良刺頑罔不扶然各究其  
實爲方伯河南鎮守巨璫恣橫不法公獨執其黨屬  
罪之而地方以寧及爲刑部屢更諸大獄若逆藩鐸  
濂及逆瑾寧彬輩相繼不軌公優然決斷悉抵於法

論者謂非守有定植才無卻流不能及也今上卽  
位特加眷遇屢荷白金彩幣寶鈔羊酒玉帶蟒服之  
賜至於賜給人口及歸省給鈔爲路費咸爲殊典公  
貴時二親在堂生膺一品之封朝廷命有司具牲米  
存問恩榮特異公以親老乞休皆溫旨勉晉北後得  
請歸養天語諄切促其復來而公浩然雅志優游林  
下者二十餘年享年八十又八以終訃聞賜諭祭并  
九遣官營葬可謂福履備至也已

焦太史編輯國朝獻徵錄卷之四十四終